

**Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaanut kingusinnerpaamik UPA2014-imi Naalakkersuisut peqquneqarnissaanut Inatsisartut aalajangiiffigisassatut siunnersuut, imaalillugu Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni aatsitassarsiornermit isertitanut paasinninnera Namminersorneq pillugu inatsimmi aatsitassarsiornermit isertitanut paasinninnermit immikkoortinneqassasoq. Allannguinermi tigussaasumik atortut, soorlu oliamik maqisuunnginnissamut atortut, illuutit sanaartukkalluunniit allat atortullu Kalaallit Nunaata Aatsitassarsiornermi Aningaasaateqarfiani aatsitassarsiornermit isertitatut naatsorsuutigineqannginnissaat allaneqartariaqarpoq.**

*Inatsisartunut ilaasortamit Naaja Nathanielsenimit, Inuit Ataqtigiit*

### **pillugu**

**Aningaasaqarnermut Akileraartarnermullu Ataatsimiititaliap**

### **ISUMALIUTISSIISSUTAA**

**Siunnersuutip aappassaaneerpeqarnissaanut saqqummiunneqartooq**

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Finn Karlsen, Siumut, siulittaasoq  
Inatsisartunut ilaasortaq Gerhardt Petersen, Atassut, siulittaasup tullia  
Inatsisartunut ilaasortaq Evelyn Frederiksen, Siumut  
Inatsisartunut ilaasortaq Jens Imanuelsen, Siumut  
Inatsisartunut ilaasortaq Kalistat Lund, Inuit Ataqtigiit  
Inatsisartunut ilaasortaq Hans Aronsen, Inuit Ataqtigiit  
Inatsisartunut ilaasortaq Naaja Nathanielsen, Inuit Ataqtigiit

Ulloq 3. oktober 2013-imi siullermeerinerup kingorna siunnersuut ataatsimiititaliamit misissorneqarpoq.

### **Siunnersuutip imarisaa siunertaalu**

Pigisat nalillit tigussaasut, nunatta aatsitassarsioqatigiiffinit pissarsiarisaasa, aatsitassarsiornermi aningaasaateqarfik pillugu inatsimmi aalajangersakkat naapertorlugit aatsitassanit isertitatut isigineqartarunnaarnissaannik kinguneqartussamik allannguutissatut siunnersuummik UPA 2014-imi saqqummiusseqqullugit Naalakkersuisut peqquneqarnissaat aalajangiiffigis-

satut siunnersuutip kingunerissavaa. Pigisat nalillit tigussaasut, soorlu illorsuaq timersortarfik uliaarluertoqarneraniluunniit qalluinnermut atortut, pissarsiarineqarnerat tunngavigalugu aatsitassarsiornermi aningaasaateqarfiup aallartinneqarnissaa taamani inatsisiliortut siunertarisimassagaat siunnersuuteqartumit ilimagineqanngilaq.

### **Siunnersuutip Inatsisartunit siullermeerneqarnera**

Siunnersuut amerlanerussuteqartunit taperserneqarpoq, pingaartumilli suut isertitatut isigineqassanersut pillugit aatsitassarsiornermi aningaasaateqarfik pillugu inatsimmi nassuiaatit namminersorneruneq pillugu inatsimmi nassuiaatigineqartunit allaanerulernerat qanoq kinguneqassanersoq paasinialugu ataatsimiititaliamut suliarineqartussanngortinneqarluni. Misissueqqissaarsimanerit arlallit misissorneqarnissaat iluaqutaasinnaasut IA-mit oqaatigineqarpoq.

### **Ataatsimiititaliap siunnersuummik suliarinninnera**

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata allanngortinneqarnissaa pillugu Inatsisartut inatsisissaatut siunnersuutip (UPA 2012/52), taamani Inuussutissarsiornermut Aatsitassarsiornermullu Naalakkersuisumit saqqummiunneqartup, suliarineqarnerani Inuussutissarsiornermut Ataatsimiititaliap inassuteqaataanut isummer-suutaanullu matuminnga siunnersuuteqarnermi siunertarineqartoq assut naapertuuttoq ataatsimiititaliamit maluginiarneqarpoq. Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaa pillugu Inatsisartut inatsisaattut nr. xx.xx xx 2012-meersussatut siunnersuummut (UKA 12/52) Inuussutissarsiornermut Ataatsimiititaliap allanguutissatut siunnersuutaani ima allassimasoqarpoq:

*”Namminersorlutik Oqartussat aatsitassarsiornermit ukiumit isertitaasa naatsorsorneqarneri nunatta karsiata naatsorsuutai tunngavigalugit pissaaq. Taamaattumik Kalaallit Nunaanni Aatsitassarsiornermit Aningaasaateqarfik pillugu inatsisartut inatsisaanni isertitarisassanut nassuiaatigineqartoq Namminersorneq pillugu isumaqatigiissutip asseqqissaarinngilaa. Tamannalu ima isumaqarpoq, assersuutigalugu oliemik mingutsisisoqarnerani akiuiniarnermi atortut nalingi, Namminersorlutik Oqartussat pisimassaat, Kalaallit Nunaanni Aatsitassarsiornermit Aningaasaateqarfik pillugu inatsisartut inatsisaat malillugu isertitanik naatsorsuinnermut ilaatinneqanngitsoorsinnaasut. Taamaaliornikkut aatsitassarsiornermi aningaasaateqarfiup nalilinnik tigusinera tunngavigalugu aningaasaateqarfiup pilersinnissaa pinngitsoortinneqassaaq, Aatsitassarsiornermit Aningaasaateqarfimmuut imaaliinnarlugit tutsinneqarsinnaanngitsut aningaasaliissutigineqarlutilluunniit.”*

Aningaasaateqarfiup aningaasaataanut atatillugu (aatsitassarsiornermik) aningaasanngorlugit isertitat kisimik ilanngunneqartassasut Inuussutissarsiornermut Ataatsimiititaliaq taamani isumaqarpoq. Inuussutissarsiornermut Ataatsimiititaliamit erseqqissarneqarpoq aningaasanngorlugit isertitanik oqarnermi pineqarmata isertitat toqqaannartumik aningaasalersuinnermi atorne-

qarsinnaasut, taamaattumillu assersuutigalugu ilinniartitaanermut immikkoortitat, atortulersuutit illutallu assigiinngitsut nalingat aningaasaateqarfiup isertitaanik naatsorsuinerimi ilaatinneqartariaqanngitsut.

Siunnersuummik suliani taaneqartumik suliarinninnermini Inuussutissarsiornermut Ataatsimiititaliamit makku oqaatigineqarput:

*”Aatsitassarsiornermi aningaasaateqarfiup tassani inissisimanissaa oqaatigineqarsinnaavoq tassaassasoq ”anigaaserivimmi uninngasuuteqarneq”, tamatumani aatsitassarsiornermit isertitarineqartut katersorneqartassallutik, taamaalillunilu taakkunannga iluanaarutinik aammalu isertitarineqartunik atuineq nakkutigineqartumik pilersaarusiugaasumillu ingerlanneqassalluni.”*

Ilinniartitaanermut immikkoortitat, atortulersuutit illutallu assigiinngitsut nalingattut missingiunneqartut “anigaaserivimmi uninngasuutit”-nut illersorneqarsinnaasumik isumaqarluartumillu qanoq ilanngunneqarsinnaanersut Aningaasaqarnermut Ataatsimiititaliamit takuneqarsinnaanngila. Atortut taamaattut il.il. atortulersuutitut atorneqartussaasut Aningaasaqarnermut Ataatsimiititaliamit naatsorsuutigineqarpoq. Taamaattumik isertitat taamaattut aningaasaanngitsut piffissap ingerlanerani imaluunniit taakku tunineqarlutik aningaasanik pissarsissutaassagaluarpata isertitatut nalertik qanoq attatiinnarsinnaaneraat Aningaasaqarnermut Ataatsimiititaliamit takujuminaatsinneqarpoq.

Naalakkersuisut akissuteqaammini ilaatigut ima allapput:

*”Namminersorlutik Oqartussanut aningaasanik aningaasaateqariup nuussisarananut aatsitassaqaarnermi aningaasaateqarnermut inatsimmi malittarisassiat Namminersornermut inatsimmi aatsitassarsiornermi isertitanik naatsorsuinerit pillugit aalajannersakkanu atasuupput.*

*Taamaattumik Naalakkersuisut paasinninnerat naapertorlugu tamanna isertitanik nassuiaaneq pillugu, aammalu aningaasaateqarfimmit nunatta karsianut aningaasanik nuussuineq pillugu aalajngiisoqassatillugu tamatuma qanoq atornissaanik tulluannngitsumik nalornisoqarnermik pilersitsissaaq.”*

Tassunga atatillugu apeqqut taanna pillugu Inuussutissarsiornermut Ataatsimiititaliap UKA 12-imi peqqissaartumik suliarinninnera Aningaasaqarnermut Ataatsimiititaliamit innersuussutigineqaqqissaaq. Taamani Inuussutissarsiornermut Ataatsimiititaliaasoq inerniliivoq Aatsitassarsiornermi Aningaasaateqarfik pillugu inatsimmik Inatsisartut allanngortitsisinnaanerannut atatillugu oqaasiliornikkut taamatut assigiissitsineq immikkut isiginiarneqarsinnaananilu isiginiarneqassanngitsoq. Aatsitassarsiornermut Aningaasaateqarfik qanoq atugassaqartitsilluni aallartinneqassanersoq Inatsisartut namminneq aalajangiiffigisinnaavaat.

Kalaallit Nunaat aatsitassarsiornermi aningaasaateqarfimmik pilersitsinissamut naalagaaffimmut pisussaaffeqartoq namminersornermut inatsimmi allassimangilaq. Tamanna Kalaallit Nunaata kisimi aalajangersinnaavaa. Taamaattumik Namminersorlutik Oqartussat aatsitassarsiornermit isertitaasa namminersornermit inatsit naapertorlugu naalagaaffimmut tunniunneqarnerat pillugu nalunaarusiornerup kingorna aningaasat Namminersorlutik Oqartussat pissarsiassaata nunatsinni Namminersorlutik Oqartussanit qanoq pingaarnersiorneqarniarnersut naallagaaffimmut namminermullu inatsimmut attuumassuteqanngilaq.

### **Siunnersuutip aningaasaqarnikkut kingunerisassai**

Siunnersuuteqartup naliliinera ataatsimiititaliamit taperserneqarpoq.

### **Ataatsimiititaliap inassuteqaataa**

Tamanna tunngavigalugu ataatsimiititaliap isumaqatigiittup siunnersuut Inatsisartunit akuerineqassasoq inassutigaa.

Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Finn Karlsen, siulittaasoq

---

Gerhardt Petersen

---

Evelyn Frederiksen

---

Jens Immanuelson

---

Naaja Nathanielsen

---

Hans Aronsen

---

Kalistat Lund